

# Perdana Menteri terima kunjungan TPM Thailand

mls: 4

BH - 9/12/2022

**Putrajaya:** Perdana Menteri, Datuk Seri Anwar Ibrahim, semalam menerima kunjungan hormat Timbalan Perdana Menteri Thailand, Jen Prawit Wongsuwan, di kediaman rasminya, di Seri Perdana, di sini.

Lawatan khas Prawit ke Malaysia itu, diiringi Timbalan Menteri Pertahanan Thailand, Jen Chaichan Changmongkol.

Ketibaan Prawit dan delegasinya di Seri Perdana kira-kira jam 12 tengah hari itu, disambut Anwar bersama Menteri Pertahanan, Datuk Seri Mohamad Hasan dan Menteri Dalam Negeri, Datuk Seri Saifuddin Nasution Ismail.

Sejurus tiba, Anwar dan Prawit mengadakan perbincangan selama hampir dua jam dan kemudiannya meraikan Prawit serta delegasinya dalam majlis

makan tengah hari.

Prawit dan delegasinya tiba di Lapangan Terbang Sultan Abdul Aziz Shah, Subang pada jam 11 pagi bagi sesi lawatan khas sehari ke Malaysia.

Kunjungan itu antara lain bertujuan memperkukuh hubungan dua hala kedua-dua negara, serta bertukar pandangan dan berkongsi maklumat bagi kebaikan serantau itu.

Malaysia dan Thailand sudah menjalin hubungan diplomatik selama 65 tahun sejak Malaysia mencapai kemerdekaan pada 1957.

Thailand adalah rakan dagang keenam terbesar bagi Malaysia di dunia dan kedua terbesar di rantau ASEAN, manakala Malaysia kekal sebagai rakan dagang keempat terbesar bagi Thailand di dunia. **BERNAMA**



Anwar bersalaman dengan Prawit selepas menerima kunjungan hormat di kediaman rasminya di Seri Perdana, semalam. (Foto BERNAMA)